

重修興平縣志

興平縣志卷五下

列女

漢景帝王皇后 槐里王仲女初爲金王孫婦母臧氏以下者
言當貴時景帝爲太子乃奪而納之太子宮生男徹景帝卽
位廢太子遂以徹爲太子王夫人爲皇后徹卽位爲武帝

漢明帝馬皇后 始平人援之女也光武時選入太子宮上奉
陰后傍接同列禮則脩備及正位宮闈愈自謙肅好讀書常
衣大練裙不加綠飾章帝卽位欲封諸舅不許曰至孝安親
爲上今數遭變異穀價數倍而先營外家之封違慈母之惓
惓乎帝乃止

興平縣志
章德竇皇后 平陵人大司徒融之曾孫也建初二年以選入
長樂令譽日聞肅宗立爲皇后妹爲貴人帝崩和帝卽位尊
爲皇太后兄憲弟篤並貴顯後憲等謀不軌被誅帝以后常
自減損令勿議

桓思竇皇后 諱妙章德皇后從祖弟之孫女也父諱武延熹
八年選入掖廷冬立爲后帝崩無嗣后爲皇太后臨朝立靈
帝宏太后父大將軍欲誅宦官曹節等爲所殺遷太后於南
宮雲臺竇氏雖誅帝以后有援立功資奉有加

靈帝宋皇后 平陵人肅宗宋貴人之從曾孫也建甯三年選
入明年立爲皇后父酆執金吾后雖正位無寵光和元年收

璽綬憂死

孝成班婕妤帝卽位選入後爲飛燕所譖考問婕妤對曰妾聞生死有命富貴在天修正尙未蒙福爲邪更以何望帝閱之婕妤退處東宮作賦自傷悼當時傳之

清河孝王慶母宋貴人平陵人宋昌八世孫也父楊以恭孝稱揚姑卽明德馬后之外祖母也馬后聞揚二女有才色迎而訓之入太子宮肅宗卽位並爲貴人

唐高祖太穆順聖竇皇后平陵人父毅爲周上柱國尙武帝姊襄陽公主入隋爲定州總管后髮垂過頸三歲與身等女誠列女等傳一過不忘隋受周禪后太息曰恨我非男子救舅

氏患毅掩其口長適唐公李淵後追謚爲穆皇后

睿宗昭成順聖寶皇后 平陵人曾祖抗父孝謀自有傳后婉

淑循禮帝爲相王納爲孺人卽位進德妃生元宗及金仙玉

眞二公主

班昭字惠姬彪之女適曹世叔早世昭寡居有節行法度博學高才兄固著漢書未竟和帝詔昭踵成之兄超老在西域昭上書哀請帝徵超還數召入宮令皇后諸貴人師事之號曰曹大家今縣西南十里有大姑村卽其故里也著女誡七章賦頌等十六篇子婦丁氏爲撰集之昭女妹曹豐生亦有才

學

馬倫融之女袁隗妻也倫有才辨融家世豐豪裝遣甚盛初成
禮隗問曰婦奉箕箒而已何乃過珍麗乎對曰慈親垂愛不
敢逆命君若慕鮑宣梁鴻之高者妾亦請從少君孟光之事
矣隗又曰南郡君學窮道奧所在之職以貨財爲損何邪對
曰孔子大聖不免武叔之毀子路至賢乃有伯寮之愬家君
獲此固其宜耳隗默然隗既貴當時倫亦有名於世倫妹芝
亦有才義少喪親長而追感作申情賦云

蘇蕙字若蘭寶滔妻也善屬文滔苻堅時爲秦州刺史被徙流
沙蘇氏思之織錦爲迴文璇圖詩以贈滔宛轉循環讀之詞
甚悽惋凡八百四十字文多不錄 案璇璣圖詩自題曰始

平蘇氏故采入

節烈

明生員姬顯妻康氏

張縉妻馮氏

孔文林妻王氏

張龍

妻劉氏

康景妻劉氏

杜鉉妻竇氏

以上七人舊志僅

傳其名事實未詳

生員閻伯仁妻葛氏生三子皆名列宮牆夫喪後三子繼亡氏

率其婦守節最苦邑令章表其門曰一門四節

生員劉侍妻姬氏夫亡守節人或求之氏剪髮毀顏痛哭自矢

求者懼而退後侍母疾割股和粥鄉里稱之御史董公督學

孫公皆先後表其門

寶門婦呂氏年二十夫賈死江淮間姑憐其幼欲嫁之婦曰從一義不可再况姑在乎姑故加箠楚以絕其情終不恨守志終身

王門婦孔氏廩生王某妻年二十夫亡守節終老萬厯中臺府旌表

楊門婦翟氏生員楊休母十八守節壽至九十臺府給匾旌之
平璽妻姬氏年二十夫亡家故貧織紉度日苦節四閩邑令旌門

李大姐生員李廷杞女爲流寇逼罵不絕聲被殺於邑南門外
巡按謝公給匾旌獎

翟二姐中軍翟自信女流寇逼於城南門外投井死崇禎中旌獎

王二姐生員王謂靖妹因拒罵流賊被殺巡按謝公題請旌表
孟伯芝妻何氏繼室也十八出嫁四月而夫故氏曰前妻之子
吾子也矢志撫孤守節終身其子學孔妻范氏亦年二十五
而寡遺一孤姑婦紡織爲生荼苦終其身俱年逾八十邑人
至今傳之

清吉正迪妻康氏故儒康衍叔女十七歸吉甫三載夫與舅姑
俱逝氏以頭觸柱欲死伯兄允迪止之以次子瑞爲氏立嗣
瑞入學有行誼雍正九年奉詔旌表

符玉妻陳氏二十三夫亡同室利其再醮氏誓死靡他織布業履以事舅姑教子德華人學雍正九年詔旌其門

岳登顯妻魏氏夫亡子幼姑逼再嫁屢加箠楚終不易志家極貧織紉撫孤氏孀居五十七年壽八十一雍正九年表

呂宗端妻趙氏年二十七夫亡翁以痛子成疾氏焚香禱天翁沒事姑及祖姑曲盡孝養教子德戟入泮雍正中詔旌

吳克勤妻張氏張翔之女嫁半載而克勤沒父母以夫家無倚迎之歸防守甚嚴以氏志在殉夫也閱三月氏忽與家人笑語父母以爲有變志不爲意氏竟於是日自縊年十六邑令申報格於例未得旌制府鄂學憲王皆先後表門

杜齊榮妻彭氏山東曹州人齊榮以賈客聘娶齊榮沒氏誓必死其兄弟強之再醮氏引刀拒之度母家終不可倚挈二孤歸興子醮長命赴曹歸齊榮柩氏一慟幾絕不食三日死邑令張宏圖爲立節孝一門傳雍正十三年詔旌

王墳曰昔程嬰存趙氏孤者也乃踰十五年而死龔勝餓死無裨於漢不如者也乃踰二十四年而死論者以龔勝餓死無裨於漢不如程嬰之兼爲其難者嗚呼彭以存杜氏孤踰三十一年而卒殉齊榮者此女子中之程嬰也龔勝不及也可不謂難乎

于天良妻張氏一日天良早起往田中同族于三覘知入其室強逼之氏驚起引刀抵拒且欲刺三三奪刀斷其喉而去臺

府以其事聞奉旨旌表

金守節妻宋氏歲荒投繯拒嫁守節四十四年賣衣珥爲姑穿
壙雍正十年旌表

張春妻姬氏舅有繼姑亦無間言閱境愁苦年五十齒豁目盲
人莫不傷之矣雍正十一年旌表

楊方水妻田氏食糠守節

馮佩琦妻岳氏撫孤一歲叔娣再嫁並撫其孤三歲俱成立二
戶雙孩一孀九鼎嘻哉難已乾隆十年旌表建石坊

杜玉珍妻范氏守節五十九年備歷艱苦乾隆中旌表

傅溥妻陳氏養舅姑守節四十六年

何汝江妻梁氏守節五十六年上二人俱乾隆二年旌表

段如秀妻牛氏奉舅姑撫孤守節五十六年

楊瑄妻馬氏撫孤守節五十九年上二人俱乾隆四年旌表

諸生高之舟妻姚氏奉舅姑教子其品舉鄉試守節三十年乾隆八年旌表

郭自才妻高氏撫孤守節享壽百齡二子傭作葬其舅姑乾隆九年旌表

馮元珠妻南氏養親撫孤矢志守節乾隆十三年旌表

馮純古妻王氏奉姑撫孤完貞全節乾隆十五年旌表

尹世明妻李氏奉姑撫孤守節五十一年旌表

劉文妻葛氏撫孤三月守節六十五年上二人俱乾隆十九年旌表

馮佩瑛妻李氏養親撫孤艱難守節乾隆二十六年旌表

李良相妻彭氏撫孤守節四十三年乾隆二十八年旌表

李斌妻魏氏苦節六十年乾隆三十九年旌表

楊又震妻尹氏撫前妻子守節四十五年

呂升雲妻郭氏撫嗣子守節六十年

魯思睿妻邊氏撫孤守節四十二年上三人皆乾隆四十一年

旌表

右節婦十七人新纂皆被綽楔之榮者

興平縣志
田九禮妻李氏乾隆五年旌表

石雨妻蘇氏乾隆十六年旌表

右烈婦二人新寡皆以強暴求姦不從羞忿自經死

梁執全妻郭氏奉姑撫孤剪髮守節五十餘年

薛承烈妻馮氏喜讀孝經列女傳承烈死養舅姑撫孤與姪俱成立

梁海妻翟氏奉舅姑撫其小叔守節

王子訪妻韓氏奉舅姑撫孤守節有儒家風

王正紀妻史氏養親撫孤守節四十八年

張銳妻魏氏銳病狂時捶楚其妻魏無怨言銳死舅姑曰禍汝

至矣年豐宜嫁魏不可撫其姪恩意周至

諸生夏從仁妻解氏守節撫孤一歲有族人謀其產者解訟之官得全鄉黨咸曰疾風知勁草也

諸生安興仁妻齊氏有議再醮者齊曰爲孝廉兒婦秀才妻維死耳撫孤守節常不舉火

趙志望妻金氏志望死遺孤兩月舅諭之嫁金曰兒三歲得離乳湏可耳屆期復言之金笑曰給翁耳嫠婦者六十日尙不嫁今又何言

陳丕妻李氏奉舅姑撫其二子糟糠守節

王者相妻裴氏守節養其叔母拾薪課子章爲諸生

高希賢妻翟氏奉舅姑守節

趙芝德妻段氏守節撫孤並撫其幼叔飢以蕎花作飯

蕭文耀妻吳氏知經書撫孤守節五十二年

陳寅妻馮氏撫孤食糠守節

王元妻張氏有遺娠守節年荒并日一食

楊思廷妻吳氏夫死請翁坐夫柩前誓曰有它志者鬼神殛之

撫二子及其幼叔養葬堂上如禮

趙履清妻田氏養親撫孤拒嫁守節

朱得元妻杜氏守節孝姑爲子授書課讀

李守公妻固氏撫孤守節五十一年田中自往耕穫